

No nga korero i puta i roto i nga pepa pakeha me nga rongo korero o Manukorihi, nui ke te whakaaro me te ahu o nga korero kia Kooti ma koira i puta taua korero 'Ki A WAI TE KOHA' i puta na i Te Toa Takitini Oketopa 1st, 1930.

No Oketopa 8th ko te pooti mema. No nga korero o mua atu he kohiri na te ngakau pooti, na reira hoki era tu korero ka puta. E toru nga wahanga i taua wa, ko Kooti, ko Forbes, ko te Takawaenga.

Otira ko te wahanga i taka atu ai ahau nei ko te Ropu Taitamariki (Young Maori Party), he mea timata mai taua kotahitanga i Te Aute Kareti, i kiia i taua-wa ko Te Aute Kareti Past and Present Student Association, ka kiia i nga tau e tu ana kia whakamatauria te tuunga mema mo Te Tairawhiti. Koina te pakanga nui a te hunga taitamariki o Te Tairawhiti i kiia ra i aua ra ko te hunga mohiti ki te hunga kore mohiti. Ma tenei pea ka marama ai koe ki tenei kaupapa chara inaianei. E korerotia ana i te ata i te ra-poupou tae noa ki te ra-to. Ahakoa pehea nga pakanga, tae mai ki tenei ra koira tonu aku korero, me aku tohutohu, otira kei te marama tonu koe. No muri mai ka tohaina ki te motu ka kiia ko "Te Ropu Taitamariki o Te Iwi Maori" kia uru mai ai a katoa.

Kaore rawa he whakaaro taunu mo to taua hoa mo Maui, ahakoa i tu apitihana, i te wa ka pera, otira i te wa ka puta nga whakaatu i te ohaki a Maui ko koe hei mau i tona tuunga, katahi ano ahau ka miharo.

No muri mai i te pooti ka tae mai nga rongo, na nga poai roia, takuta, M.A., LL.B., me era atu reta rarahi na te hunga kura koe i tautoko, katahi ahau ka tino whakamiharo rawa ki nga puawai o te rau tau hou. Otira kua pu te ruha. O tatou kaumatua kua ngaro katoa. Kua marama te hao a te Ranga-tahi.

Kua kaumatua tatou katoa. Na konei pea tatou ka timata nei ki te takatakahi i a 'matou' ture i whakatakoto ai i nga ra pai kua huri ki muri.

Tena pea kua kitea e nga 'poai' na nga makenu o nga tikanga tohutohu o nga kura me nga matauranga pera, i nara i mama ai te rukenga ake i aua ahuatanga, peke ana ki te tau-toko i a koe, i te mohitikore, e taunutia ra e ratou i nga ra ka huri ki muri.

Otira kua whawhaitia te whawhai pai; kua omaina te oma whakataetae, a kua riro i a koe te wikitoria, na reira me nui rawatu nga mihi kia koe, ahakoa ou tino hoariri i roto i taua pakanga, me maunu te potae kia Te Tomo.

Mo te marangai-areare e takoto ake nei mo Te Momo me nga korero maatua, waiho ake ena, kei te nui rawa nga putake nunui hei mauranga mau o te motu, he poto rawa hoki te wa mou ki reira, kotahi ano Paremata, ka pooti ano koutou, pea.